

gefiessene Dienste in vnttertehnigkeyt bereyt. Gnediger fürst vnnnd herr, ich bitte in gnaden von myr zuuornemen, das ich E. f. g. bey dem achtbarn vnnnd hochgelartten der erczney Doctorn Johan bretttschneyder, vbersende die briefe, die myr die herrn Pomeranus, Spalatinus, vnnnd andere, an E. f. g. zwbrenge, in Deutschland gegeben, vnnnd bitte E. f. g. wöll des vorzuges, dardurch die briefe bey myr lenger dan ich vorhofft vorhalten seyndt, keyn ungnediges gefallen haben. Dan solliches ane alle meyne vorlassung geschehen, vnnnd seyndt die briefe alleyn aus dieser vrsachen E. f. g. bißanher bey anderen durch mich nicht zw geschafft wurden, das ich neben dem obgedachten Doctor teglich gewartet der briefe, die er hintter sich bey etzlichem seynem geredt gelassen, der hoffnung das sie eh odder ye also baldt solten alhie ankommen seyn alß er selbst, damit sie zwgleych E. f. g. gebracht, vnnnd durch yn überreycht möchten werden. Nuhn aber solliches ankommen, durch vnvorhoffte zwfall vorblieben, so habe ich dem vorzuge ettwas mehr nach gegeben dan ich sunst gewöllt hette. aus dieser vrsachen, das ich die contrafactur der Türckischen schlacht ordnung, die ich E. f. g. neben den briefen vbersende zwbesichtigen, vnnnd ab es E. f. g. gefellig abzwmahlen zw lassen, nicht gerne eynem yedern vortrawe. Dan myr solliche zw sonderlicher freundschaft zwgeschickt, vnd weyß die nicht zw vberkommen, ich wöllt sie dan selbst lassen abmahlen, das ich alhie nicht zw thun weyß auß mangel der mahler die darzw geschickt weren. Derhalben ich dan auch E. f. g. ganz dienstlich will gebeten haben, das sie myr dieselbige contrafactur widderumb zw schigken wollt, wan sie die yres gefallens hatt lassen abmahlen. Dan ich die gerne conferiren wöll mit eynem buche das ich yeczunder auß Deutschland gebracht habe, de disciplina militari apud Turcas etc. Ich habe auch mit myr auß Deutschlandt gebracht, der Türcken Alcoran, vnnnd sunst viel andere bücher von yrer religion, leben und wesen, Die ich zuvor nicht gesehen. Welches ich dan E. f. g. darumb anzeyge, ab sie geneyget solliche in yre bibliothecam zuorschaffen, das sie das bezzeyten thun müge, eh dan sie vorruckt werden. Sunst weyß ich nischt sunderlichs in Deutschlandt, das E. f. g. begeren möchte zw wiessen. Es seyndt wol viel newer Zeyttung alda, vom Turgken, bapste, vnd der nidderdendischen kriegem, aber sehr vngewiß. Wie dan bißher auch die zeyttung von keys. M. ankunfft gewest seyndt, also das myr nischt gueblichers ist vorkommen. dan das M. Philippus Melanchton heut Dato vor dreyen wochen ist widder von wittenbergk komen, vnd bestendiglich gesagt hett, das der keyser Carolus V zw Speyr sey gewesen, wie er durch frankfurt am Meyne gezogen in dieser seyner widderfartt, daruon ich dan etzliche briefe entpfangen, die myr von wittenbergk derhalben zwgeschrieben. Von wellekem allem der obvermelte Doctor E. f. g., ab sie des begeret.